

Ibaluwa kwa Waebulaniya

Ichilongole

Ibaluwa kwa Waebulaniya tsayandikighwa kuwaghuma ghumoyo Wakiristu. Nayu yolangusa Yesu pfatimilitse unabii wa Laghano lya Ghumwande. Mne ibaluwa ino hana mbuli ka sitini itsili mne Laghano lya Ghumwande itsilangusa ghendo ka Yesu katimitsa unabii na sang'ano tsa Mtambika Mkulu wa Chiyahudi. Kwa chinu acho ibaluwa ino yakoneka yandikighwa ili kuwaghuma ghumoyo Wakiristu wa Chiyahudi. Yesu iyo nambiko ya nzambi tsose, mala lumwe na kwa matsuwa ghose. Wakiristu wa matsuwa ghano nawo pififla wodaha kughumighwa ghumoyo na ibaluwa ino waghendelele kumuwinza Yesu Kiristu iyotutenda tudahe kumtoghola Imulungu, na kughendelela kumtoghola ye ye imwenyegho (12:2).

Haduhu imunu iyomanya ibaluwa ino tsayandikighwe na nani, lekeni iwasomi wolonga kodha kuwa mtumighwa Pauli au Luka au Balinaba. Kuya haduhu imunu iyomanya yandikighwe tsuwachi, ila iwanu wengi wakona yandikighwa mne miyaka ya sabini kulawa Yesu helekighwe. Yerusalemu tsaihinyighwa mne ghumwaka sabini kulawa Yesu helekighwe, lekeni imunu yandike ibaluwa ino kolonga mbuli tsa Yerusalemu ka ng'ana ihinyighwe. Ibaluwa ino tsayandikighwa mne ghumji ghwa Roma (13:24) na lamda tsabitia mne makanisa mengi.

Ighali mghati

Isula ya 1:1-4:13 Imunu andike ibaluwa ino kolangusa ukulu wa Yesu kwa manabii we Imulungu na kwa wamalaika

Isula ya 4:14-7:28 Kolangusa ka Yesu Kiristu ka mkulu kubita iwatambika iwasang'anee mne ing'anda ye Imulungu akula Yerusalemu.

Isula ya 8:1-10:31 Kuya kolangusa sang'ano ya Yesu ng'ulu kubita laghano lya ghumwande lyayalaghane Imulungu ne iwanu wake kubitila malaghitso ghamwing'ile Musa.

Isula ya 10:32-13:17 Hamalitse kulangusa ukulu wa Yesu kwa chila chinu, kolapfa malangulitso mengi.

Isula ya 13:18-25 Komalitsila ibaluwa yake kwa kuwaghuma iwanu ghumoyo na kuwalamsa iwanu.

Imbuli ye Imulungu kubitila Imwanaghe

1 ¹Aho ghumwande Imulungu tsakalonga na aba tsetu mala nydingi na kwa nzila nydingi kubitila manabii wake, ²lekeni mne ghamatsuwa ghano gha ukutsigha kalonga na twetwe kubitila Imwanaghe, iyamsaghule na yamwing'ile pfinu pfose pfiwe pfake, kuya kubitila ye ye Imulungu tsakalumba isi yose. ³Yeye katumwemwesela utunitso we Imulungu, na keghala ghendo ne Imulungu imwenyegho pfayali. Kaikindilisa isi yose ighendelele kuwa baho kwa mbuli yake ine ingupfu. Hamalitse sang'ano ya kuwatenda iwanu wele kulawa mne nzambi tsawo, kakala kulanga ubali wa ghumoko ghwe kujilo ghwe Imulungu.

Imwana we Imulungu mkulu kubita wamalaika

⁴ Imwana katendighwa mkulu kubita wamalaika, ka tagħwa lyeng'ighwe ne Imulungu pfalili kulu kubita tagħwa lyawo. ⁵ Mana Imulungu ng'amlongeġe ghendo malaika wowose,

- “Ghweghwe kwa Imwanangu
 lelolli nolonga nene niwa Aba wako.”
 Wala ng’alongile ghendo kwa malaika.
 “Nitsakuwa Aba wake,
 naye katsakuwa Mwanangu.”
⁶ Lekeni Imulungu hayomghala chaudele wake muisi, kolonga,
 “Wamalaika wose we Imulungu wamtamanile”
⁷ Lekeni kuna wamalaika Imulungu kalonga,
 “Imulungu kawatenda libeho
 wamalaika wake
 na iwatumwa wake kawatenda kuwa imilambi ye ghumoto.”
⁸ Lekeni kwa imwana, Imulungu kalonga,
 “Undewa wako, ghwe Imulungu, ng’au mala bae.
 Ghweghwe kwotawala kwa kumnoghelesa Imulungu.
⁹ Ghweghwe konoghela ghamatendo ighomnoghela Imulungu na koghahila
 ghehile.
 Apfo Imulungu, Imulungu wako kakusaghula,
 kakutenda udeng’elele ng’ani
 kubita pfawatendile weyagho.”
¹⁰ Kuya kalonga,
 “Ghweghwe Imtwatsa aho mwanduso tsakulumba isi yose,
 kwa ghamoko ghako tsakulumba kulanga.
¹¹ Napfo pfitsohupa, ila ghweghwe kutsosighala,
 pfose pfitsolala ka lighwanda.
¹² Kutsotsibotabota ka gholole,
 natso tsitsoghaluka,
 lekeni ghweghwe kutsosighala pfipfo pfauli
 na ughima wako ng’autsomala bae.”
¹³ Imulungu ng’amlongle mbe malaika wowose,
 “Ukale hano ubali wangu wa kujilo
 mbaka hanitsoweka wehile wako
 hasi ha ghamaghulu ghako.”
¹⁴ Lelo kuya wamalaika tsina nani? Wawo muhe iwomsang’anila Imulungu, na
 waghalighwa nae kuwapfila awala iwatsobokela ukombotsi.

Ukombotsi mkulu

2 ¹ Lelo tughakinde ghendo aghala ighatuhulike ili tuleke kuleka kupfika
 kwatughenda. ² Usenga ula iulongighwe ne wamalaika woneka wolongesa
 ghendo, imunu wowose yang’au kindile au kuutogholo kohighighwa ka
 pfaibamighwa. ³ Lelo twetwe tutsohonatse ka ng’atuutogholo bae ukombotsi
 uno mkulu? Tanu Imtwatsa tsakalonga ukombotsi uno, kuya awala iwamuhulike
 walangusa kuna twetwe ka wolongesa. ⁴ Imulungu naye kongetsa ukalangama
 wake kwa kutenda pfitango, pfihulo na pfinzonza ketseketsé, na kwa kuwagholela
 iwanu pfigholelo pfa Ghumuhe Mwenzeluka ka pfayabamile.

Yesu iyo iyotulongotsa mne ukombotsi

- ⁵ Imulungu ng’awekile bae malaika kutawala isi iikutsa, isi ila yatulonga mbuli
 tsake. ⁶ Lekeni Ghamaandiko Mahenzeluka hanu hangi gholonga,
 “Imunu chinu chachi mbaka umwalangule?
 Imwana we imunu chinu chachi mbaka umlolese?
⁷ Tsakumtenda yawe mdodo kubita wamalaika,

kumpfika fiya ya utunitso na heshima.

⁸ Kwika chila chinu chiwe hasi hake."

Yolongighwa Imulungu tsakamwika imunu yawe mtawala we pfinu pfose, ng'achisighala hata chinu chimwe bae. Lekeni ng'atukona ipfinu pfose imunu ppopfitawala sambi,⁹ ili twomwona Yesu iyatendighwe mdodo kubita wamalaika kwa chipindi chidodo, ili kwa uluso we Imulungu yawafile iwanu wose. Sambi twomwona kapfatsighwa fiya ya utunitso na heshima kwa ukufa kwayadununzike.¹⁰ Tsaiakala pfinogha ghendo Imulungu iyolumba na ukukindilisa ipfinu pfose, yamtende Yesu kuwa mkamiliwu kwa inzila ye ukudununzika, ili yawaghale iwanu wengi mne utunitso wake. Kwaapfila Yesu iyo iyowalongotsa mne ukombotsi.¹¹ Yeye kowadeghetesa iwanu nzambi tsawo, yeye na awala iwadeghetesighwe, wose wana aba yumwe. Kwaajili ayo Yesu ng'akona chinyala bae kuwakema iwanu awo ndughu tsake,¹² kolonga,

"Nitsolipeta taghwa lyako kwe iwanu wangu,
nitsokutunya mne ghumtingano ghwawo."

¹³ Ppfifila kolonga, "Nitsakwika lololo lyangu kuna yeye. Kuya kalonga keli, nene nabaha ne iwanu iyangaile Imulungu, wawe wana wangu"

¹⁴ Lelo kwaapfila iwana awo wana lukuli na idamu, Yesu imwenyegho tsakawa ka wawo, kelunga na unu wawo. Tsakatenda apfo ili kubitila lifwa lyake amuhume Yehile yane uwetso mne lifwa,¹⁵ na apfo yawalekelele awala iwakalile watumwa mna ughima wawo wose. Tsawakala watumwa kwa kupfuka ukufa.¹⁶ Kwaapfila yeye ng'atsile ghendo bae kuwapfila wamalaika ila katsa kuwapfila iwatsukulu wa Abrahamu.¹⁷ Apfo tsakabamighwa yeghale na ndughu tsake kwa chila chinu, ili yawe Mtambika wawo mkulu iyotogholighwa na yane libatsi mne kumsang'anila Imulungu, ili nzambi tse iwanu tsileghusighwe.¹⁸ Kwaapfila yeye mwenyegho tsakadununzika ahala hayaghetsighwe, kodaha kuwapfila awala iwoghetsighwa.

Yesu ka mkulu kubita Musa

3 ¹ Apfo ndughu tsangu iwanu we Imulungu, imkemighwe ne Imulungu,
² mmwalangule Yesu, Imtumighwa na Mtambika mkulu we inogholu yatuilonga toitogholi. ² Yeye tsakakala kotogholighwa ne Imulungu, iyamsaghule kutenda isang'ano yake, ka Musa pfayang'ali iyotogholighwa mne ukuwasang'anila iwanu wose wa Isiraeli, iwakemighwe ing'anda ye Imulungu. ³ Imunu iyotsenga ing'anda kotunyighwa kubita ing'anda yenyejho, lelo Yesu kotunyighwa kubita Musa.

⁴ Kwaapfila chila ing'anda itsengighwa ne imunu, lekeni Imulungu iyo iyatsengile chila chinu.⁵ Musa tsayang'ali yotogholighwa ka mtumwa kwe iwanu wose wa Isiraeli, iwakemighwe ing'anda ye Imulungu, na tsakalonga ipfinu apfila Imulungu pfayatsolonga hambele,⁶ ili Kiristu katogholighwa ka imwana mne ing'anda ye Imulungu. Twetwe iwenyegho twa ing'anda yake ka twoghendelela ukwima bila ukupfuka na kuchilolela achila chatwighodela.

Ukubwihiла kwe iwanu we Imulungu

⁷ Apfo ka Ghumuhe Mwenzeluka pfayolonga mne Ghamaandiko Mahenzeluka,

"Leloli mng'ahulika litsi lye Imulungu,

⁸ mleke kutenda imimoyo yenu iwe misughu,

ka pfawatendile iwabala wenu hawalemile kunihulikitsa,

ghamatsuwa ghala hawanighetsile

akula kunyika.

⁹ Ako iwabala wenu tsawanighetsa na kunidodosa,

hata ka tsawaghona ghanendile kwa miyaka makumi mane.

¹⁰ Apfo niwonela maya iwanu wala, nilonga,

'Ghamatsuwa ghose Iweleko lula Iwakwagha,
na ng'alumanya bae nzila tsangu.'

¹¹ 'Tsanilaha kwa maya nilonga,
ng'awatsakwingila mbe hanu hangu ha kubwihiha! '

¹² Lelo ndughu tsangu, mwalangitse mghati mwenu kuleke kuwa ne imunu yane ghumoyo ghuhiile na wa kulema kutogholo, kwa kwibaghula ne Imulungu iyali mghima. ¹³ Lekeni hamghendela kuhulika mbuli ila leloli yosomighwa mne Ghamaandiko Mahenzeluka, mwighume ghumoyo chila litsuwa ili kuleke kuwa ne imunu mghati mwenu iyotendighwa mkomu kwa ukughutsukighwa ne nzambi.

¹⁴ Kwaapfila twakuwa wamwe mna Kiristu, tung'akindilisa kwe ingupfu mbaka utsighilo lolelo lyetu lyatubokele mwanduso.

¹⁵ Ka Ghamaandiko Mahenzeluka pfaghlonga,

"Leloli mng'ahulika litsi lye Imulungu,
mleke kuitenda mimoyo yenu iwe misughu,
ka pfawatendile iwabala wenu hawamlemile Imulungu."

¹⁶ Kuya tsina nani iwahulike litsi lye Imulungu na kumlemela? Pfii si awala wose bae iwalongotsighwe na Musa kulawa Misiri? ¹⁷ Angu tsina nani Imulungu yawonele maya kwa miyaka makumi mane? Kawonela maya awala iwatendile nzambi, ng'uli tsawo tsatsenela kunyika. ¹⁸ Angu Imulungu helahile, "Ng'awatsakwingila mbe hanu hangu ha kubwihiha," yang'ali yowalonga tsina nani? Yang'ali yowalonga awala yang'awamuuhulikitse. ¹⁹ Lelo twakona ng'awadahile ukwingila ako kwaapfila tsawalema kutogholo.

4 ¹ Lelo kwaapfila laghano lye ukwingila hanu hake ling'ali baho, twalangitse imunu wowose mna twetwe aleke kuleka kwingila hanu hao ho ukubwihiha.

² Kwaapfila Imbuli Inoghile tsaipetighwa kuna twetwe ka pfaipetighwa kuna wawo iwanu wa ghumwande. Lekeni usenga awo ng'auwapfile chinu bae, kwaapfila tsawahulika ila ng'awaubokele kwa ukutogholo. ³ Twetwe itutoghole tutsakwingila hanu ho ukubwihiha ka pfayalongile.

"Tsambona maya na nilaha,

'Ng'awatsakwingila mbe hanu hangu ha kubwihiha! '

Imulungu tsakalonga agho hata ka isang'ano yake tsaimala kulawa hayalumbile isi yose. ⁴ Kwaapfila Ghamaandiko Mahenzeluka gholonga mbuli tsa litsuwa lya saba, "Imulungu tsakaloka sang'ano yake yose, litsuwa lya saba kabwihiha." ⁵ Kuya chinu chino cholongighwa keli, "Ng'awatsakwingila mbe hanu hangu ha kubwihiha." ⁶ Apfo laghano lye ukubwihiha ling'ali baho, na iwanu wala iwapelighwe Imbuli Inoghile aho mwanduso tsang'awengile hamo kwaapfila ng'awategheletse bae. ⁷ Chinu chino cholangusa kuwa Imulungu keka litsuwa lingi, ilikemighwa "Leloli." Miyaka mgingi ibitile tsakalonga kubitila Daudi ka Ghamaandiko Mahenzeluka pfaghlonga,

"Leloli mng'ahulika litsi lye Imulungu,

mleke kuitenda mimoyo yenu iwe misughu."

⁸ Mana ka Yoshua ang'awatendile iwanu wabwihiile, ka pfayalongile Imulungu, Imulungu ang'alekile kulonga mbuli tsa litsuwa lingi hambele. ⁹ Apfo kubwihiha kwe iwanu we Imulungu kung'ali baho ka Imulungu pfabwihiile tsuwa lya saba. ¹⁰ Imunu wowose yakwingila hanu ha kubwihiha ka pfayalongile Imulungu, ayo katsoleka sang'ano yake na kubwihiha ka Imulungu pfalekile sang'ano yake na kubwihiha.

¹¹ Lelo twiyunde twingile mne ukubwihiha ako, ili kuleke kulawila imunu wowose mna twetwe aleke ukughwa kwa kulema kutegheletsa ka pfawatendile wawo.

¹² Kwaapfila mbuli tse Imulungu tsina ughima na ingupfu, tsotema kubita mmaghe ighutema kuno na kuno. Kuya tsakwingila mbaka hane ghumoyo na muhe, ka limaghe ilitema mbaka mghati mwa pfilungo na ulojo, kuya tsomanya ghaikwalangula na ghaibama mimoyo ye iwanu. ¹³ Kuduhu chilumbe chochose

ichipfisighwe kwe Imulungu, chila chinu chighubulighwa kuna yeye iyatubamighwa tumlongele ghamatendo ghetu.

Yesu Mtambika mkulu

¹⁴ Apfo kwaapfila twinaye Mtambika mkulu iyengile mbaka kulanga kwe Imulungu, Yesu Imwana we Imulungu, leka tukindilise ukutogholia kwetu kватulonga totogholia. ¹⁵ Mtambika wetu mkulu kotwonela libatsi, kwaapfila yeye mwenyegho tsakaghetsighwa mna chila chinu ka twetwe, ila ng'atendile nzambi bae. ¹⁶ Lelo tuchighendele chighoda che undewa che Imulungu yane uluso bila kupfuka, tubokele libatsi na uluso mne chipindi cho ukutwapfila.

5 ¹ Chila mtambika mkulu kosaghulighwa kulawa kwe iwanu wake, ² kakwikighwa yawatendele iwanu isang'ano ye Imulungu kwa kumlapfila maghweko na nambiko kwaajili ya nzambi tsawo. ³ Kwaapfila yeye imwenyegho tsakahungukighwa ghendo, kodaha kuwonela libatsi iwanu awala ing'awomanya chinu na iwakwagha. ⁴ Na kwaapfila yeye imwenyegho kahungukighwa, kobamighwa yelapfile mwenyegho nambiko, si kwaajili ye iwanu wangi waliheka bae, ila pfipfila kwaajili ya nzambi tsake. ⁵ Kuduhu imunu iyetenda imwenyegho kuwa mtambika mkulu. Imulungu iyo iyomkema yawe mtambika mkulu, ka pfakalile Aruni. ⁶ Kiristu Mkombotsi pfipfila ng'etendile bae imwenyegho yawe Mtambika mkulu. Ila Imulungu kamlongela,

“Ghweghwe kwa Imwanangu,
leloli nolonga niwa Aba wako.”

⁶ Pfipfila hanu hangi mne Ghamaandiko Mahenzeluka kalonga,
“Kutsakuwa mtambika ghamatsuwa ghose,
ka pfakalile Melikisedeki.”

⁷ Mna matsuwa ghake ghakalile muisi, Yesu tsakamlomba na ukumdedetsa na kumlilila ng'ani kwa masotsi Imulungu, iyodaha kumkombola kulawa mne liwa. Kwaapfila tsakakala mhole na kompfuka Imulungu, Imulungu kamuhulikitsa.

⁸ Hata ka tsakakala Imwana we Imulungu, kelangulitsa ukutegeheletsa kubitila ukudununzika kwake. ⁹ Hayamatlse sang'ano yatumighwe kutenda, kawa mwanduso we ukombotsi wa ghamatsuwa ghose kwa awala iwomuhulikitsa, ¹⁰ na Imulungu kamsaghula yawe mtambika mkulu, ka pfayakalile Melikisedeki.

Tuleke kuya kuchughu

¹¹ Kuya twinagho mengi gha kulonga kwa chinu chino, lekeni pfikomu kughalonga ghoya kwaapfila mwemwe muwa wadebwé ukwilangulitsa. ¹² Sambi tsambamighwa muwe walangulitsi, kwaapfila ghamatsuwa mengi ma ghabita, lekeni mwemwe mwobama keli imunu yawalangulitse malangulitsi gha mwanduso ghe mbuli tse Imulungu. Sambi muya kuchughu mwobama ukughwawa na si ukuja chijo chikomu bae. ¹³ Chila imunu iyoghwawa matombo ng'odaha bae kughatanga ighomnoghela Imulungu, kwaapfila ayo ang'ali mwana mdodo. ¹⁴ Chijo chikomu cha iwanu iwabala, wane tsimbutsi itsilangulitsighwe kubaghula ighanoghile na ighehile.

6 ¹ Lelo tugheke hambali ghamalangulitso gha mwanduso gha mbuli tsa Kiristu, tughende hambele kwa ghamalangulitso ighakomale. Si kughendelela kwika keli ghumsingi ghwa kuleka ghamatendo ghalihela sang'ano, na ghwa kumtogholia Imulungu, ² ghamalangulitso gha ubatitso, ukwikighwa ghamoko, kutsilihuka kwe iwanu na ukuhighighwa kwa ghamatsuwa ghose. ³ Tughendele hambele Imulungu ang'abama.

⁴ Kwaapfila iwanu iwaghbulilighwe ukweli we Imulungu na kulanza pfigholelo pfa kulanga, na ukwilunga na Ghumuhe Mwenzeluka, ⁵ na kulanza umta we mbuli

tse Imulungu, na ingupfu ye ghamatsuwa ighakutsa,⁶ ng'aidahika bae kuwoyitsa watoghole keli kutsileka nzambi tsawo, kwaapfila kwa kuleka kwawo kutoghola, wawo wenyegho ka womuwamba keli Imwana we Imulungu mna msalaba na kumghela chinyala hambele he iwanu.

⁷ Mghunda ighubokela imvula ighutowela ghamatsuwa ghose na ukotetsa imimyea inoghile kwaajili ye imunu iyolima, ghugalikighwa ne Imulungu.⁸ Lekeni mghunda ighukotetsa imibiki ye tsimiwa na mighughu, wahela sang'an, ghwabehi kulightighwa ne Imulungu, kuya yolakatsighwa mmoto.⁹ Lekeni sale tsetu, hata ka twolonga pfino, twomanya ghendo ka mwa mne inzila inoghile imlongotsani mne ukombotsi.¹⁰ Imulungu ng'ohigha pfihile bae. Yeye ng'atsoisemwa bae isang'an yenu au unoghele wenu yamuulanguse kuna ye ye kwa kuwapfila iwanu wake na pfamghendelela kuwapfila.¹¹ Twobama chila munu mna mwemwe alanguse ukwiyunda kuko mbaka utsighilo, ili achila chambetetsa chitimile.¹² Ng'atubama bae muwe wadebwe, ila muwe ka awala iwatoghole na kududumila, kuya tsawabokela chalaghane Imulungu.

Laghano lye Imulungu lya kweli

¹³ Imulungu hayekile laghano na Abrahamu, tsakatumila taghwa lyake kwilaha kwaapfila kuduhu imkulu kubita Imulungu, kuna ye ye ang'elahile.¹⁴ Imulungu tsakalonga, "Nitsokubaliki ghendo, nitsokwing'a iwanu wengi."¹⁵ Abrahamu tsakabetetsa kwa ukududumila, kuya kabokela achila chayalongelighwe ne Imulungu.¹⁶ Iwanu hawelaha, welaha kwa yula iyali imkulu kubita wawo, na ukwilaha kolangusa ka ichilongighwe cholongesa, na kwilaha komalitsa ukwihisanya kwose.¹⁷ Naye Imulungu pfiplo tsakakindilisa chalaghane kwa ukwilaha, kwa kutenda apfo kawalangusa awala yelaghane nawo ka ng'atsoghalusa chayobama.¹⁸ Hana pfinu pfino pfibili ng'apfidaha kughaluka, mna apfo Imulungu ng'odaha bae kulonga ughutsu. Lelo twetwe yatutsumilile hanu tsegħamba twogħumighwa għumoyo kukindilisa ghendo lolelo ilikighwe hambele hetu.¹⁹ Tuna lolelo lino ka nanga^a kwa ughima wetu. Lolelo aloy lima na lina ngupfu, lyakwingila mghati mwe ilipanziya, mbaka hanu haenzeluke,²⁰ amwo hayengile Yesu kwaajili yetu, chilongotsi wetu, kawa mtambika mkulu kwa ghamatsuwa ghose ka pfayakalile Melikisedeki.

Mtambika Melikisedeki

⁷ ¹ Ayu Melikisedeki tsakakala mndewa għumji ghwa Salemu, na mtambika we Imulungu iyali kuchanya ghendo. Abrahamu hayang'ali yakuya kulawa mng'ondo ako kwayawakomile iwandewa, Melikisedeki tsaketingana naye, kambaliki,² naye Abrahamu tsakamwing'a kumi limwe lye ipfinu pfose pfayang'ali napfo. Mana ya tagħwa lyake "Imndewa wa kutenda ighanoghile," pfipfila ye ye tsakakala "Imndewa wa Salemu," mana yake "Imndewa wa tindiwalu."³ Tsakahela aba wala mai, tsakahela lukolo, kuduhu imunu iyomanya yelekighwe tsuwatchi wala yafile tsuwatchi. Tsakeghala ne Imwana we Imulungu, koghendelela kuwa mtambika għamatsuwa ghose.⁴ Lelo mløle, imunu ayo pfayakalile mkulu. Hata mbala wetu Abrahamu tsakamwing'a kumi limwe lye ipfinu pfose pfayabokile mng'ondo.⁵ Na awala lukolo lwa Lawi iwakalile watambika tsawalaghtsighwa na Għamalagħitso Imulungu għamwing'ile Musa, wabokele kumi limwe lye ipfinu kulawa kwe iwanu we Israeli, ndugħu tsawo, hata ka tsawakala watsukulu wa Abrahamu.⁶ Melikisedeki ng'awile bae wa lukolo lwa Walawi, lekeni tsakabokela kumi limwe lye pfinu kulawa kwa Abrahamu, kuya kambaliki ye ye iyabokele malaghano.

^a6.19 nanga; chuma chitito ichihulumsighwa hasi mwe għamatsi ili imeli ileke kuka

⁷ Ng'ailemighwa bae ka imunu iyobaliki ka mkulu kubita ayula iyobalikighwa.⁸ Kuya iwatambika iwobokela kumi limwe lye ipfinu wa iwanu iwakufa, lekeni hano kumi limwe lye ipfinu tsalibokelighwa ne imunu iyolongighwa ka mghima ghamatsuwa ghose, ka Ghamaandiko Mahenzeluka pfaghlonga.⁹ Kuya twodaha kulonga, iwanaghe Lawi iwobokela kumi limwe lye ipfinu, kubitila Abrahamu nawo tsawaliha kumi limwe lye ipfinu,¹⁰ Kwaapfila Melikisedeki hayatingane na Abrahamu, Lawi tsayang'ali mlukuli mwa Abrahamu, imbala wake.

Yesu keghala na Melikisedeki

¹¹ Kwaapfila Waisiraeli tsaweng'ighwa ghamalaghitso kwa sang'ano ya ukutambika ya Walawi. Lelo ka ukutambika kwa Walawi kwotimitsa ghose, ebalu yabamighwe mtambika yungi iyeghalile ne Melikisedeki, na si Aruni bae?¹² Mana ukutambika kung'aghalku, ghamalaghitso nagho ghobamighwa ghaghalkuke.¹³ Naye Imtwatsa wetu, iyolongighwa mbuli tsino, kolawila mlukolo lungi, na kuduhu imunu wa lukolo alwo iyasang'ané hanu ha kutambikila.¹⁴ Kwaapfila twomanya ghendo ka yeye kalawila mlukolo Iwa Yuda, na Musa ng'alongile chinu bae kwa lukolo luno kwa mbuli tsa watambika.

¹⁵ Kuya chinu chino cha mwatsimwatsi ghendo ka mtambika yungi iyeghalile na Melikisedeki kalawila.¹⁶ Yeye ng'atendighwe mtambika kwa ghamalaghitso ghe iwanu, ila kwa ngupfu tsa ughima ulihela utsighilo.¹⁷ Kwaapfila Ghamaandiko Mahenzeluka gholonga, 'Ghwegħwe kutsakuwa mtambika ghamatsuwa ghose, ka pfakalile Melikisedeki.'¹⁸ Lelo laghitso lila lya għumwande tsalikighwa hambali kwaapfila tsalyahela ingupfu na tsalyahela sang'ano.¹⁹ Mana Għamalaghitso gheng'ighwe Musa ne Imulungu ng'aghadahile bae kutenda chinu chochoso chitimile, lekeni sambi twing'ighwa lolelo linoghile, kubitila lolelo aloyo twodaha kumghendela Imulungu habehi.²⁰ Kuya hano Imulungu tsakelaha, ila awala wangi hawatendighwe watambika tsakuduhu ukwilaha.²¹ Lekeni Yesu tsakawa mtambika kubitila ukwilaha ahala Imulungu hayamlonge,

"Imtwatsa tsakelaha,

kuya ng'atsogħalusa achila chobama,

'Għwiegħwe kwa mtambika ghamatsuwa ghose.'

²² Kwa ukwilaha kuno, Yesu kawa mwimilitsi wa lagħano ilinoghile ghendo kubita lila lya mwanduso.

²³ Kuya awala watambika wangi tsawakala wengi kwaapfila tsawang'ali wakufa, apfo ng'awadahile bae kughendelela ne isang'ano yawo.²⁴ Lekeni kwaapfila Yesu ka mghima ghamatsuwa ghose, ukutambika kwake ng'akumala bae.²⁵ Apfo yeye kodha kuwakombola ghendo awala iwomtsila Imulungu kubitila yeye, mana yeye kokala ghamatsuwa ghose yawalombele kwe Imulungu.

²⁶ Kwaapfila tsaibamighwa tuwe na mtambika mkulu ka yuno iyali mwenzeluka, iyalihela totso lyolyose wala nzambi, yabaghulighwe kutali na wane nzambi, na yenulighwe kubita kulanga.²⁷ Yeye ng'egħala ne watambika wakulu wangi bae, ng'obamighwa kulapfa nambiko chila litsuwa, tanu kwa nzambi tsake imwenyegħo, kuya kwa nzambi tse iwanu wangi. Tsakalapfa inambiko mala lumwe hela kwa iwanu wose baho helapfile imwenyegħo.²⁸ Għamalaghitso gheng'ighwe Musa ne Imulungu għowasaghula iwanu yang'awakamilike waww ġewwa watambika wakulu, lekeni lagħano lye Imulungu il-tendighwe kwa ukwilaha, ilitsile hambele he Għamalaghitso agho, lyomsaghħula Imwana, iyatendighwe yatimilike għamatsuwa ghose.

Yesu mtambika wetu mkulu

8 ¹ Imbuli ng'ulu kubita ghose għatulongile, iyo ino, tuna Mtambika mkulu iyakalile lubali lwe kujilo lwe chighoda che undewa che Mkulu aka kulanga.² Yeye

Kosang'ana ka mtambika mkulu hanu hala haenzeluke kubita hanu hohose, hane bumbulika lye Imulungu lya kweli, ilitsengighwe ne Imtwatsa, si ne iwanu bae iwatsengile.³ Chila mtambika mkulu kosaghulighwa amlapfile Imulungu ghweko ne nambiko, lelo mtambika wetu mkulu kabamighwa yawe na chinu cho ukumlapfila Imulungu.⁴ Ka ang'awile wa hano muisi, ang'alekile kuwa mtambika mbe, kwaapfila ma kuna watambika iwolapfa ghweko ka pfaghalaghitse Ghamataghitso gheng'ighwe Musa ne Imulungu.⁵ Nawo wosang'ana aghala igheghala na ghumfano au sisila lya ighali kulanga. Pfipfo Musa habamile kutsenga bumbulika lila, kalongelighwa ne Imulungu, "Ulole, utsenge ka pfulangusighwe haukalile kuchidunda."⁶ Lekeni sambi Yesu keng'ighwa isang'ano ya ukutambika inoghile kubita yawo, ka pfayali mlamlitsi wa laghano ilinoghile kubita laghano lila, kwaapfila lima mne ipfinu pfinoghile ghendo pfalongile Imulungu.

⁷ Kwaapfila ka laghano lila ililongole ng'aliwile na totso bae, ng'alibamighwa bae laghano lya keli.⁸ Lekeni Imulungu kona matotso kwe iwanu wake, kalonga, "Imtwatsa kolonga, ghamatsuwa ghakutsa,

hanitsakwika laghano lya sambi ne iwanu wa Israeli ne iwanu wa Yuda.

⁹ Ng'alitseghala bae ne laghano lyanyikile ne iwabala wawo, ghamatsuwa ghala haniwakindile ghamoko na kuwalongotsa walawe mne isi ya Misiri.

Kwaapfila ng'awakindile laghano lyangu,
na nene tsaniwalema.

¹⁰ Lekeni alino laghano lyanitsotenda ne iwanu wa Israeli,
hambele ha ghamatsuwa agho,
nitsakwika ghamalaghitso ghangu mne tsimbutsi tsawo,
nitsoghandika mne mimoyo yawo,
Nitsakuwa Imulungu wawo,
nawo watsakuwa iwanu wangu.

¹¹ Kuduhu imunu yatsomlangulitsa miyaghe,
au kumlóngela ndughu yake,
'Mmanyé Imtwatsa'

kwaapfila wose iwanu wakulu ne iwadodo watsonimanya.

¹² Nitsowaleghusila matotso ghawo na nzambi tsawo sitsotsipfikitsa keli."

¹³ Kwa kulislonga laghano lya sambi, kalitenda lila lya mwanduso lilale, na chinu chochose ichilala cha habehi kuhupa.

Ukutambika muisi na ukutambika kulanga

9 ¹ Laghano lya mwanduso likala na malaghitsa gha ukutamanila na hanu hakutamanila hatsengighwe ne iwanu.² Tsahatsengighwa bumbulika lye Imulungu, chiheleto chake cha mwanduso tsachikemighwa Hanu Haenzeluke, amwo tsamkala na hanu ha kwikila pfifasa na imetsa ne pfifate ipfilapfighwe kwe Imulungu.³ Kuchughu mwa lipanziya lya keli tsakukala na chiheleto ichikemighwe Hanu Haenzeluke Ghendo.⁴ Hamo tsamkala na hanu ha kupfukitsa upfumba ha nzahabu, na sanduku lya laghano ilighubikwe hosehose na nzahabu, mghati mwake tsakukala na chiha che nzahabu ichikalile ne chijo ichikemighwe mana, ng'weku ya Aruni iisanule mitsani na pfibao ipfandikighwe ghamalaghitso.

⁵ Mchanya mwe sanduku tsakukala na pfinyagho pfibili pfine ghamapamanilo ka chitango cha utunitso we Imulungu, ghamapamanilo ghawo tsaghaghubika hanu hatsileghusighwa nzambi. Lekeni sambi ng'atudaha bae kulonga chinaghanagh mbuli tse pfinu pfino.

⁶ Pfinu pfino hapfimalile kutendighwa, watambika tsawang'ali wakwingilagha mne chiheleto cha mwanduso na kulapfa nambiko chila litsuwa.⁷ Lekeni mtambika

mkulu yaliheka iyang'ali yakwingila mne chiheleto cha kibili, naye tsakatenda apfo mala imwe iliyeka kwa ghumwaka, tsakengilagha na idamu ya kumlapfila Imulungu kwaajili yake imwenyegho na kwaajili ye nzambi tsawatendile iwanu bila kumanya.⁸ Ghumuhe Mwenzeluka kolangusa chinu chino, inzila ya ukwingila hanu Haenzeluke Ghendo ha kulanga tsang'ana ipfughulighwe bae, kwaapfila chiheleto cha kunze tsaching'ali baho.⁹ Chinu chino cheghala na ghamatsuwa ghano gha sambi, maghweko na nambiko tsolapfighwa lekeni ng'atsidaha bae kutenda imimoyo ye iwanu iwomtamanila Imulungu ileke kuwa na matotso,¹⁰ kwaapfila ukuja na ukunwa na ukwopfuga lukuli, tsapifikala pfihendo pfe lukuli lulye, na ngupfu yake itsomala Imulungu hatsopfitenda pfinu pfose pfiwe pfa sambi.

¹¹ Lekeni Kiristu katsa, ka mtambika mkulu wa ighanoghile ighapfikile sambi. Yeye tsakengila mne bumbulika kulu na ilinoghile ghendo, ing'alitsengaghwe kwa ghamoko ghe iwanu bae, si bumbulika lya isi ino ilumbighwe.¹² Tsakengila hanu Haenzeluke Ghendo mala imwe hela, naye ng'engile na idamu ye mvulati au idamu ye ng'ombe, ila kwa idamu yake imwenyegho, na katughalila ughombotsi wa ghamatsuwa ghose.¹³ Kwaapfila ka idamu ya mvulati na ng'ombe na lipu lye ng'ombe iyali mbughuma pfawamitsilighwe iwanu wehile, pfiwatenda iwanu awo wele nguli tsawo,¹⁴ lelo pfi idamu ya Yesu Kiristu, ambe unogha ghendo? Yeye kwa ingupfu ya Ghumuhe iyokala ghamatsuwa ghose, tsakelapfa imwenyegho yawe nambiko inoghile, iitsotendula mimoyo yetu yele ghendo kulawa mne ghamatendo ghetu ghehile, ili tumsang'anile Imulungu iyali mghima!

¹⁵ Apfo Kiristu iyo mlamlitsi wa laghano lya sambi, ili awala iwakemaghwe wabokele laghano lya ukuhala kwa ghamatsuwa ghose. Kwaapfila ye ye tsakafa ili yawaghombole iwanu kulawa mne nzambi tsawatendile mne laghano lila lya ghumwande.

¹⁶ Kwaapfila usiya wotogholighwa, ka ayula yaulongile kafa,¹⁷ kwaapfila usiya una ingupfu ka imunu yaulongile kafa, usiya wahela ingupfu ka munu yaulongile ka mghima.¹⁸ Apfo hata laghano lila lya mwanduso ng'alyanduse bae bila idamu.

¹⁹ Tanu Musa kawalongela iwanu wose chila laghitso illi mne Ghamalaghitsa ghayeng'ighwe ne Imulungu, kuya kasola idamu ya ndama na mvulati na ghamatsi, na sufi na imitsani ya hisopo^b, tsakachimitsila Chitabu che Ghamalaghitsa na kawamitsila iwanu wose.²⁰ Tsakalonga, "Aino idamu ya laghano lyalaghitse Imulungu mlikinde."²¹ Pfiipfila Musa tsakamitsila idamu mne bumbulika lila ne ipfinu pfose pfa ukutambikila.²² Na mne Ghamalaghitsa habehi ipfinu pfose pfotendighwa pfela kwa idamu, na nzambi yoleghusighwa ahala halijeka haukwitika idamu.

²³ Pfinu pfino ipfighalile ne ipfinu pfa kulanga tsapfibamighwa kutendighwa pfela kwa nzila ayo. Lekeni ipfinu pfa kulanga pfobama nambiko inoghile ghendo.

Idamu ya Yesu yoleghusa nzambi tse iwanu

²⁴ Kwaapfila Kiristu ng'engile bae Hanu Haenzeluke hatsengaghwe kwa ghamoko ghe iwanu bae, hanu heghalile na hanu henyegho hali kulanga. Tsakengila kulanga kwenyegho, sambi kakwima hambele he Imulungu kwaajili yetu,²⁵ wala Kiristu ng'engile kulanga kulapfa lukuli Iwake chila ghumwaka ka Mtambika mkulu pfayengile Hanu Haenzeluke Ghendo na idamu yaili si yake bae,²⁶ mana ing'awile apfo, Kiristu ang'adununzighwe mala nyngi kulawa isi hailumbighwe. Lekeni sambi matsuwa agha ighali habehi kutsigha, ye ye kalawila mala lumwe hela kuleghusa nzambi kwa nambiko ya lukuli Iwake imwenyegho.²⁷ Ka imunu pfayakufa mala lumwe hela, kuya kohighighwa ne Imulungu,²⁸ pfipfo Kiristu naye tsakelapfa

^b**9.19** hisopo, mmea wighalile na mpfumbasi

nambiko mala lumwe hela ili yawaleghusile nzambi iwanu wengi. Hayatsolawila Iwakeli, ng'oitsila bae inzambi, ila kakutsa kuwakombola awala iwomlolela.

10¹ Kwaapfila Ghamalaghitso gheng'ighwe Musa ne Imulungu gheghala na sisila lya ipfinu pfinoghile ipfikutsa, pfelinga na apfila pfa kweli, nambiko tsila tsa Ghamalaghitso gheng'ighwe Musa ne Imulungu itsilapfighwe kwa kuyillayillila chila ghumwaka ng'atsidaha bae kuwatenda wanoghe awala iwomtamanila Imulungu.² Ka iwanu wala iwomtamanila Imulungu wang'atendighwe wela ghendo kulawa mne nzambi tsawo, wang'alekile kwibona keli ka wana nzambi, na nambiko tsila tsawolapfa tsose tsing'amalile.³ Lekeni nambiko tsila tsitendeka chila ghumwaka kuwakumbusa iwanu nzambi tsawo.⁴ Kwaapfila idamu ye mvulati na ng'ombe ng'aidaha bae kuleghusa nzambi.

⁵ Apfo Kiristu hayang'ali yakutsa muisi, tsakamlongela Imulungu,

"Ng'ubamile nambiko wala sadaka,

lekeni tsakuniyandalila lukuli.⁶ Nambiko tsa kulakatsighwa au tsa kuleghusa nzambi ng'atsikunoghele bae.

⁷ Kuya tsanilonga, 'Nabaha ghwe Imulungu,

kutenda aghala ghubama

ka pfanyandikilighwe mne Chitabu cha Ghamalaghitso gheng'ighwe Musa ne Imulungu.'⁸

⁸ Tanu tsakalonga, "Ng'ubamile bae wala ng'unoghelesighwe na tsinambiko na sadaka, nambiko tsa kulakatsighwa na tsa kuleghusa nzambi." Tsakalonga apfo hata ka nambiko tsila tsose tsatsilapfighwa ka Ghamalaghitso pfaghabamile.⁹ Kuya kalonga, "Nene nabaha, ghwe Imulungu, kutenda aghala ghubama." Apfo Imulungu keka hambali nambiko tsa ghumwande, keka nambiko ingi imwe.¹⁰ Kwaapfila Yesu Kiristu tsakamalitsa ghayobama Imulungu, twetwe twodeghetesighwa nzambi tsetu kwa inambiko ya lukuli Iwake mwenyegho yalulapfile mala lumwe hela.

¹¹ Chila mtambika kosang'ana chila litsuwa, kolapfa nambiko tsitsila mala nyingi, nambiko ing'atsidaha mbe kuleghusa nzambi.¹² Lekeni Kiristu kalapfa nambiko imwe kwaajili ya kuleghusa nzambi, nambiko inoghile ghamatsuwa ghose, kuya kakala lubali lwe kujilo Iwe Imulungu,¹³ kobeta wehile wake wekighwe hasi ha ghamaghulu ghake.¹⁴ Kwaapfila kwa nambiko imwe tsakawatenda awala iwodeghetesighwa wanoghe ghamatsuwa ghose.

¹⁵ Ghumuhe Mwenzeluka pfipfilia kotulangusa ukalangama wa mbuli ayo. Tanu kolonga,

¹⁶ Imtwatsa kolonga, "Alino laghano lyanitsolaghana nawo hambele ha ghamatsuwa agho, nitsakwika ghamalaghitso ghangu mne mimoyo yawo na kughandika mne tsimbutsi tsawo."

¹⁷ Kuya kalonga, "Sitsotsipfikitsa keli nzambi tsawo, na ghehile ghawatendile."

¹⁸ Lelo aghanu ghang'aleghusighwa, kuduhu keli kulapfa nambiko ya kuleghusa nzambi.

Tumsoghelele Imulungu

¹⁹ Lelo ndughu tsangu, kwa idamu ya Yesu twodaha ghendo kwingila Hanu Haenzeluke Ghendo bila kupfuka.²⁰ Yeye tsakatupfughulila inzila ya sambi, inzila itulongotsa mne ughima kubitila lipanziya lila kwa kulapfa lukuli Iwake.²¹ Lelo tuna mtambika wetu mkulu ghendo iyolongotsa mne ing'anda ye Imulungu.²² Apfo tumsoghelele Imulungu kwa imimoyo ya kweli na kwa ukutogholia bila kupfuka, aku mimoyo yetu itotsile yele, tuleke ghehile na ng'uli tsetu tsiofpughighwe kwa ghamatsi ghelile.²³ Tulikinde ghendo lolelo lyetu lyatulitogholia na kulilonga, kwaapfila Imulungu yekile laghano lyake kotogholighwa.²⁴ Twilolese twetwe kwa

twetwe, twighume ghumoyo, twinoghele na kutenda ghanoghile.²⁵ Kuya tuleke kuleka kwitingana hamwe, ka wamwenga pfawatendagha, ila twighume ghumoyo na tughendelele kutenda apfo, ghendoghendo ka pfamkona litsuwa lye Mtwatsa lyahabehi.

²⁶ Kwaapfila tung'aghendelela kutenda nzambi ghiladi aku twomanya ukweli, kuduhu nambiko iidaha kulapfighwa keli kwaajili ya kuleghusa nzambi.²⁷ Lekeni ichisighala, kuko ukubeta kwa kupfuka kuhighighwa ne Imulungu kwa ghumoto ighulambil ighutsowahinya wose iwombela.²⁸ Imunu yaghalemile Ghamaalaghitsa gheng'ighwe Musa ne Imulungu, tsakakomighwa bila libatsi ka kuna wakalangama weli au wadatu.²⁹ Lelo mkonatse, kobamighwa yahighighwetse imunu iyambetsile Imwana we Imulungu na kyona si chinu bae idamu ye laghano lye Imulungu iimdeghetetse, imunu iyomliha Ghumuhe ghwe Imulungu?³⁰ Kwaapfila twomanya chayalongile Imulungu, “Nene nitsowoyitsila chawamtendeleni, nene nitsowalia wawo,” kuya kalonga, “Imtwatsa katsowahigha iwanu wake.”

³¹ Kughwila mna ghamoko ghe Imulungu iyali mghima, chinu cha kupfuka ghendo!

³² Lekeni kumbukani ghamatsuwa gha mwanduso hala hamghubulilighwe ukweli we Imulungu. Hata ka tsamduunzika ghendo, mwemwe tsamduumila.

³³ Ghamatsuwa ghangi tsamlighighwa na kutendelighwa ghehile hambele he iwanu, ghamatsuwa ghangi tsamtogħola kuwa hamwe na awala iwadununzike pifpo.³⁴ Tsamuwonela libatsi wohighwa, na hambokighwe pfinu pfenu tsamtogħola kwa ukudieg'elela, kwaapfila tsammany ka mna chinu chinogħile kubita apfo na chokala ghamatsuwa ghose.³⁵ Lelo mleke kwagħitsa lolelo lyenu, kwaapfila lin ġħwex kulu ghengo.³⁶ Mdudumile ili mtende ġħobama Imulungu na kubokela achila chawalonge.³⁷ Ka Ghamaandiko pfagholonga,

“Ing'ali chidogħo,
ayo iyakutsa katsakutsa,
ng'atsokawa bae.

³⁸ Iwanu wangu iwotenda ighorinogħeletsa watsotogħola na kukala wagħima, lekeni wang'apfukapfuka,
sinogħeletsighwa nawo bae.”

³⁹ Lekeni twetwe si iwanu wa ukupfukapfuka bae na ukuhinyighwa, ila twetwe twotogħola na twokombolighwa.

Ukumtoghola Imulungu

11 ¹ Ukumtoghola Imulungu kuko kumanya kwa hakika aghala għatubeta, na kutogħola ghengo aghala yang'aghakoneka bae.² Kwa ukutogħola kwawo, iwabala wetu tsawatogħolighwa ne Imulungu.³ Kwa kumtoghola Imulungu twetwe twomanya ka isi yose tsailumbighwa kwa lagħitso lya Imulungu, ipfinu ipfikoneka pilumbighwa kulawa mne pfinu ing'apfikoneka.

⁴ Kwa kumtoghola Imulungu Abeli tsakamlapfila Imulungu nambiko inoghile kubita ya Kaini. Kwa kutogħola kwake, kamnogħelesa Imulungu ahala haitogħole nambiko yake. Hata ka Abeli tsakafa, aghala għatendile għang'ali għotulangulitsa.

⁵ Kwa kumtoghola Imulungu Enoki tsakasolighwa kulanga, apfo ng'afile bae. Ng'oneke keli kwaapfila Imulungu tsakamsola. Ghamaandiko Mahenzeluka għolonga hala ng'ana yasolighwe, tsakatogħolighwa ka imunu iyamnogħelesse Imulungu.⁶ Kuduhu imunu iyodha kumnogħelesa Imulungu bila kumtoghola, kwaapfila imunu wowose iyomghendela Imulungu kobamighwa atogħole ka Imulungu kabaho, nae kowaghweka awala iwombama kwa ukwiyunda.

⁷ Kwa kumtoghola Imulungu Nuhu tsakalongelighwa ne Imulungu aghala iġħakutsa hambele, aghala ng'ana ghoneke bae. Kwa pfilia pfamuhulikitse Imulungu,

Katsenga safina^c, amwo ye ye na iwanu we kaye yake tsawakombolighwa. Kwa kutogholo kwake kalangusa iwanu we isi yose weha, na Nuhu kawa muhatsi wa haki iikutsa kwa kutogholo.

⁸ Kwa kumtogholo Imlungu Abrahamu hakemighwe aghende mne isi iyalongile Imlungu katsomwing'a, koka mne isi yake kuya ng'amanyile ang'ali yoghenda kwani. ⁹ Kwa kumtogholo Imlungu, Abrahamu tsakakala muhenza mne isi yelaghane ne Imlungu. Tsakakala mne pfibumbulika na Isaka na Yakobu, iwabokele ghaghala ghalaghane Imlungu. ¹⁰ Kwaapfila Abrahamu tsayang'ali yobeta ghumji ghune ghumsingi, ghumji ighupfiksighwe na kutsengighwa ne Imlungu mwenyegho.

¹¹ Kwa kumtogholo Imlungu Abrahamu tsakawa aba hata ka tsakalala ng'ani, na Sara tsaang'ali ng'akweleka bae. Abrahamu tsakamtogholo Imlungu ka katsotimitsa laghano lyake. ¹² Apfo kubitila imunu yumwe Abrahamu iyakalile ka kafa, tsawelekighwa iwanu wengi ing'awodahika bae kuperighwa, ka tsinondo tsa kulanga na msanga ghwa kumwani.

¹³ Iwanu wano wose tsawafa aku womtogholo Imlungu. Ng'awabokele bae aghala ghayalaghane Imlungu, ila tsawaghona kwa kutali, tsawatogholo ka wawo tsawahenza na wabita nzila muisi. ¹⁴ Iwanu awala iwlomba apfo, wakoneka ka woibama isi yawo iwenyegho. ¹⁵ Wang'aikumbuke isi ila yawalawile, wang'adahile kubwela. ¹⁶ Lekeni sambi woibama isi inoghile ghendo, isi ya kulanga. Apfo Imlungu ng'akona chinyala bae kukemighwa Imlungu wawo, kwaapfila kawatendela ghumji.

¹⁷ Kwa kumtogholo Imlungu Abrahamu tsakatogholo kumlapfa nambiko Isaka imwanaghe nyalimwe hala hayaghet sighwe, tsakatenda apfo hata ka Isaka tsakakala imwana wa laghano lye Imlungu. ¹⁸ Kwaapfila Imlungu tsakamlongela, "Kubitila Isaka kutsopata watsukulu wanikulonge." ¹⁹ Abrahamu tsakatogholo Imlungu kodaha kuwatsilihula iwanu iwafile, kwa kulonga apfo Abrahamu tsakambokele keli Isaka kulawa kwe iwanu iwafile.

²⁰ Kwa kumtogholo Imlungu Isaka kawabaliki Yakobu na Esau, kwa aghala ighakutsa hambele.

²¹ Kwa kumtogholo Imlungu Yakobu hayang'ali habehi kufa kawabaliki iwanu wose wa Yosefu, kamtamanila Imlunguaku kaghamila ng'weku yake.

²² Kwa kumtogholo Imlungu Yosefu hayang'ali habehi kufa, tsakalonga mbuli tsa Waisraeli kulawa Misiri, kawalahitsa waitendetse imipate yake.

²³ Kwa kumtogholo Imlungu welesi wa Musa tsawampfisa Musa kwa miyetsi midatu kulawa hayoneke. Tswawmwona kakala imwana yanoghile, ng'awapfukile bae ghamalaghiso gha imndewa.

²⁴ Kwa kumtogholo Imlungu, Musa hakulile kalema kukemighwa imwana wa neghe Farao mndewa wa misiri. ²⁵ Tsakasaghula kudununzika ne iwanu we Imlungu kubita kudeng'elela uhondo wa nzambi kwa ghamatsuwa chidogho.

²⁶ Tsakona ukundununzikila Kiristu Mkombotsi kunogha ghendo kubita tsimali tsa Misiri kwaapfila tsayang'ali yololela ghweko lyake lya hambele.

²⁷ Kwa kumtogholo Imlungu Musa tsakalawa Misiri bila kupfuka maya ye mndewa. Kwaapfila tsakamlolela ghendo Imlungu yang'akoneka bae. ²⁸ Kwa kumtogholo Imlungu tsakatenda chihungo cha Pasaka na kulaghitsa idamu imitsighwe mne mibani, malaika wa lifwa aleke kuwakoma iwanu chaudele wa Waisraeli.

²⁹ Kwa kumtogholo Imlungu Waisraeli tsawaloka ibahali ya Shamu ka mne isi isakale, lekeni Wamisiri hawabamile kuloka tsawafa mne ghamatsi.

^c11.7 safina; yeghala ne imeli ing'ulu

³⁰ Kwa kumtoghola Imulungu imibanda ya ghumji ghwa Yeriko ighwa hasi Waisraeli hawaitsunguluke kwa ghamatsuwa saba. ³¹ Kwa kumtoghola Imulungu Rahabu, pinga chiweghe ng'akomighwe bae na awala yang'awamuhulikitse Imulungu, kwaapfila tsakawabokela pfinoghile wapelembi wa Waisraeli.

³² Lelo nonge choni keli? Nahela nyafwasi ya kulonga mbuli tsa Gidioni na tsa Balaki na tsa Samsoni na tsa Yefita na tsa Daudi na tsa Samweli na tsa manabii.

³³ Awo kwa kumtoghola Imulungu tsawahumna iwandewa. Tsawahigha ka pfaimnogheletsa Imulungu na wabokela chayalaghane Imulungu. Tsawadiwa imilomo ye simba. ³⁴ Tsawatsima milambi ya ghumoto, tsawahoneka kukomighwa kwa imimaghe. Hawang'ali wahela tsingupfu, waghumighwa tsingupfu, tsawakala ne ngupfu mng'ondo, wawawinga asikali wahenza. ³⁵ Kwa kumtoghola Imulungu iwapinga wamwenga tsawoitsighwa iwanu wawo iwafile iwatsilihulighwe. Wangi wawo tsawadununzika mbaka wafa, waleka kutoghola kulekelighwa ili watsilihuke na kwingila ughima unoghole. ³⁶ Wangi tsawabetsighwa na kutowighwa mbalati, na wamwenga tsawohighwa na kwasighwa mchifungo. ³⁷ Tsawafa kwa kutowighwa na ghamabwe, tsawaghanighwa kwa msumento pfihande pfile, wakomighwa kwa imimaghe, tsawanga kuno na kuno aku wapfala ngotsi tse iwang'olo ne iwamene. Tsawakala wahingwa, wadununzighwa na watendelighwa ghehile.

³⁸ Tsang'aibamighwe bae iwanu we isi yose ino wakale ne iwanu ka awo. Tsawang'ali woyungayunga kunyika na mpfidunda, tsawakala mne tsimango na mne mijondo muisi.

³⁹ Iwanu wano wose watogholighwa ka wahuma kwa ukutoghola kwavo. Hata apfo ng'awabokele bae aghala ghalongile Imulungu, ⁴⁰ kwaapfila Imulungu tsakatutendela twetwe chinu chinoghile ghendo kubita chawabokele wawo, ili wawo waleke kukamilika bila twetwe.

Imulungu kowahigha iwanaghe

12 ¹ Apfo ka pfatuli ne kingili kulu lye iwalangama hambele hetu, tuleke chila mtsigho ghwatwinagho na nzambi iitunanahila, na mna mdawalo ghwa kutsuma ighwikighwe hambele hetu tutsume kwa kudumila. ² Tumtsodelele tsinenge Yesu iyanduse ukutoghola kwetu na iyatsoitimitsa. Kwaajili ye ndeng'elelo ikighwe hambele hake tsakaudumila msalaba, tsakona ichinyala si chinu bae, naye kokala ghumoko ghwa kujilo ghwe chighoda che undewa che Imulungu.

³ Mumkumbuke Yesu, pfadununzike na iwanu wane nzambi pfawamwihiile. Lelo mleke kwipfa na kutenyuka ghumoyo. ⁴ Mne ukwihisanya kwenu na nzambi ng'anamwihisanye mbaka mlapfe idamu yenu. ⁵ Pfii msemtwa imbuli ila ya kughuma ghumoyo ahala Imulungu hayokemani mwemwe iwanaghe?

Mwanangu uleke kubetsa Imtwatsa hayokukanya,
kuya hayokukembela uleke kutenyuka ghumoyo.

⁶ Kwaapfila Imtwatsa komuhigha chila imunu iyomnoghela,
na komkanya chila imwana iyotogholighwa naye.

⁷ Mdudumile ahala hamkanyighwa, Imulungu kowatendelani ka iwanaghe. Apfi imwana wachi yang'okanyighwa na aba wake? ⁸ Ka ng'amkanyighwa ka pfawokanyighwa iwanaghe wose, mwemwe si iwanaghe ghendo, ila wana halamu.

⁹ Kubita agho, twetwe tsatukala na aba tsetu iwatweleke iwatukanyile, na twetwe tsatuwatogholu kwa chinu acho chawatendile, lelo ambe pfinogha ng'ani tung'amtgeheletsa ghendo Aba wetu wa kulanga, ili twing'ighwe ughima. ¹⁰ Aba tsetu iwatweleke tsawatukanya kwa matsuwa madodo ka pfawonile iwenyegho pfinogha, ila Imulungu kotukanya kwa ukutwapfila twetwe, ili tuwe wahenzeluka wake. ¹¹ Lekeni sambi ukukanyighwa si chinu cha kudeng'elsa bae, ila chinu

ichighala usungu, lekeni hambele ukukanyighwa kutsoghala ghampafuno gha tindiwalo na ukukala kwa kumnoghelesa Imulungu kwa awala iwakanyighwe.

Malaghitso na makanyo

¹² Lelo mghaghume ngupfu ghamoko ghenu ighaleghele, kuya mgholose ghamaghoti ghenu ighaleghele. ¹³ Mghendelele kubita mne inzila iigholoke, ili achila ichiholole chileke kugholojoka ila chihonet sighwe.

¹⁴ Mwiyunde ghendo kukala kwa tindiwalo ne iwanu wose na kukala kwa uhenzeluka, kwaapfila kuduhu imunu iyatsomwona Imtwatsa ka ng'enzeluke bae. ¹⁵ Mwalangitse ghendo, imunu wowose aleke kuhungukiwa na uluso we Imulungu, aleke kuwa ka sina lya usungu ilitula na kuwaghalila maghayo iwanu wengi. ¹⁶ Kuleke kuwa na mghoni wala imunu yang'ompfuka Imulungu bae, ka Esau iyautsile uhatsi wake wa kuwa chaudele kwa chijo chimwe. ¹⁷ Kwaapfila mwomanya hata hambele habamile kuipata keli ibalaka ila, tsakalemighwa kwaapfila ng'adahile bae kughalusa chayatendile, hata ka tsakaibama ghendo kwa masotsi.

¹⁸ Mwemwe ng'ampifikile bae hane chidunda Sinai ka iwanu wa Isiraeli pfawapfikile, chidunda ichidaha kukindighwa,aku chakwaka ghumoto, hane liwingu titu, ichisi na libeho kulu, ¹⁹ na litsi lya malati na litsi ililonga mbuli. Iwanu wala iwhulike litsi aloyo, tsawalomba kwa ukudedetsa waleke kuhulika keli, ²⁰ kwaapfila ng'awadahile bae kulibokela laghitso iilongi ghwe, "Hata mnyama ang'achidonza chidunda acho, atowighwe ghamabwe mbaka afe." ²¹ Agho ghose ghawatenda wapfuke sideke, mbaka Musa kalonga, "Nodedema na ukupfuka!"

²² Lekeni mwemwe mchipfikila chidunda Sayuni, hane ghumji ghwe Imulungu iyalu mghima, Yerusalem ya kulanga, hamwe ne wamalaika wengi yang'awopeteka. ²³ Mwemwe mtsa mne mttingano we chihungo che iwanu we Imulungu, iwkemighwa welekighwa wa mwanduso we Imulungu, iwandikighwe mataghwa ghawo kulanga. Mtsa kwe Imulungu, yowahigha iwanu wose na muhe tse iwanu iwmnoghelesa Imulungu iwakamili. ²⁴ Mwemwe mtsa kwa Yesu, mlamlitsi wa laghano lya sambi na idamu yake ighumitsighwe yolonga ghanoghile kubita idamu ya Abeli.

²⁵ Mwalangitse, mleke kulema kumuhulikitsa ye ye iyolonga namwe. Kwaapfila ka ng'awahoneke bae awala iwamlemile ye ye iyawakanyile hano muisi, twetwe twodahatse kuhona tung'amlema iyolonga na twetwe kulawa kulanga! ²⁶ Litsi lyake tsalihighisa isi ghamatsuwa ghala, lekeni sambi kalaghana, kalonga, "Nitsoihighisa keli mala lumwe si isi iliheka bae, ila na kulanga pfifila." ²⁷ Imbuli ayo "mala lumwe keli" yolangusa ghendo ka ipfinu ipfilumbighwe pfitsohighisighwa na kulapfighwa, ili pfisighale apfila ing'apfidaha kuhighisighwa.

²⁸ Lelo kwaapfila tubokela undewa ing'audaha kuhighisighwa bae, mleke tumlonge Imulungu mighede, tumtamanile kwa kumnoghelesa na kwa kumtegheletsa na kwa kupfuka, ²⁹ kwaapfila Imulungu wetu ka ghumoto ighuhinya ghendo.

Kumtunya Imulungu

13 ¹ Mghendelele kwinoghela chindughu. ² Mleke kwisemwa kuwabokela iwhenza mmakaye mwenu, kwaapfila kwa kutenda apfo iwanu wangti tsawawabokela wamalaika aku ng'awamanyile bae. ³ Mleke kuwasemwa awala iwalu mchifungo ka mwemwe mwohighwa hamwe nawo. Muwakumbuke awala iwdununzika ka namwe mwodununzika nawo.

⁴ Iwanu iwekwelile wehulikitse, mmale au mwehe yaleke kuwasa ne imunu yungi. Imulungu katsowahigha wagħoni na watsinzi.

⁵ Mleke kunoghela ng'ani tsisendi, mdeng'elele na ipfinu pfamwinapfo. Kwaapfila Imulungu kalonga,
 "Sitsokuleka mbe,
 sitsokwasa mbe." ⁶ Apfo twodaha kulonga bila kupfuka
 Imtwatsa iyo iyonyapfila,
 Sitsopfuka bae.
 Imunu katsonenda choni?

⁷ Muwakumbuke awala iwang'ali womlongotsani, iwamlongeleni imbuli ye Imulungu. Mkumbuke pfawakalile na pfawafile, mwighale nawo pfawamtoghole Imulungu. ⁸ Yesu Kiristu ka yuyula, ligholo, leloli na ghamatsuwa ghose. ⁹ Mleke kusolighwa ne ghamalangulitso ghangi, pfinogha mimoyo yetu ighelighwe ngupfu kwa uluso we Imulungu, wala si kwa malaghitso ghe ipfijo bae, kwaapfila malaghitso agho ng'aghawapfile bae awala iwaghawinzile.

¹⁰ Twetwe tuna hanu ha kutambikila, amo awala iwasang'ana mne bumbulika lya ukutamanila lya Wayahudi waghomighwa ukuja inambiko yake yoyose. ¹¹ Mtambika mkulu koghala idamu ye iwanyama Hanu Haenzeluke Ghendo, koghulapfa ka inambiko ya kuleghusa nzambi, lekeni ng'uli tse iwanyama tsolakatsighwa kunze mwe kambi. ¹² Apfo Yesu naye ili yawadeghetese iwanu kwa idamu yake imwenyegho, kadununzika na kufa kunze kwe ghumji. ¹³ Lelo leka tumghendele kunze kwe kambi tukalighighwe ka yeye pfalighighwe. ¹⁴ Kwaapfila hano muisi twahela ghumji ighukala ila twokalitsa ghumji ighukutsa. ¹⁵ Lelo kubitila Yesu tumlapfile Imulungu nambiko yo ukumtunya ghamatsuwa ghose, mbuli atso tsa utunitso, tsitso sadaka tsetu hala hatulonga Yesu ka Mtwatsa. ¹⁶ Mleke kwisemwa kwitendela ghanoghile na kwiyapfa, kwaapfila nambiko ka atso, tsitso itsimnogheletsa Imulungu.

¹⁷ Muwategheletse awala iwomlongotsani na kuwinza malaghitso ghawo. Wawo wofolesa muhe tsenu, kwaapfila watsomlongela Imulungu pfawamsang'anile. Mng'awategheletsa watsotenda sang'ano yawo aku wodeng'elela, ka ng'amuwategheletsa watsosang'ana kwa kusing'inika, na chinu acho ng'achitsomwapfilani bae.

¹⁸ Mtulombele. Twotogħola ghengo ka mimoyo yetu ng'aitulongela bae tutotsa, mana twobama kutenda ghanoghile mne pfinu pfose. ¹⁹ Nowalomba ghendo mnilombele Imulungu ambuyitse himahima kuna mwemwe.

Malombi għa ukumalitsila na ndamso

²⁰ Lelo, Imulungu wa tindiwalo iyamtsilihule Imtwatsa wetu Yesu, imdimi mkulu we iwang'olo kwa idamu iilangusa lagħano lya kweli lya ghamatsuwa ghose, ²¹ awatende mwemwe mkomale mne chila chinu chinogħile chamtenda, mdahe kugħatenda ghayobama, na kwa kubitila Kiristu yatende aghħala ighamnogheletsa imwenyegħo mghati mwetu. Utunitso uwe kuna Yesu Kiristu ghamatsuwa ghose! Ona.

²² Ndugħu tsangħu nowalomba ghendo, muubokele usenga uno wa kughuma għumoyo kwa kududumila, aino ibaluwa ndodo hela yanimwandikileni. ²³ Nobama mmanye ka ndugħu yetu Timoteo kalekelelighwa kulawa mchifungo, ang'atsa sambi nitsakutsa naye kumwonani.

²⁴ Walamseni wose iwomlongotsani na iwanu wose we Imulungu. Wandugħu wa isi ja Italiya womlamsani.

²⁵ Uluso we Imulungu ukale namwe mwose.